

Eröffnungsbank

Liebi Lüt do im Saal ' Schön sit ihr alli do
das ihr mit eus Chluuris chömet cho fire ' das macht eus alli froh
60 Joor Chluuri Zunft ' und mir händs no immer druff
und im Gegäsatze zu euch ' gsehnd mir all Joor jünger us

es freut mi au ganz bsunders ' wo ich ha vernoh
es sige sogar no es paar ' Gründigsmiglieder do
und au suscht ehemaligi Chluuris ' düend mir speziell begrüesse
ich hoff ihr deget de Obe mit eus ' au so richtig gniesse

setti mis Oergeli ämol falsch töne ' völlig unverhofft
isch das es Zeiche das de wo spielt ' isch zimmi unterhopft
dr Rico wo im Service schafft ' weiss was ich do demit wött sägä
die trochni Luft uf derä Bühni ' isch fascht nid z' erträgä

wenn ihr scho alli do sit ' denn wer ich huere froh
wenn ihr mi bim Reffrain singe ' nid allei düend loh
die meischde vo euch wüsse scho ' wie das setti klinge
drum düend mir jetz grad mitenand ' de Reffrain einisch singe

Reffrain:

*Jä das isch eusi Chluuri jä eusi Chluurizunft
scho mängisch a de Fasnacht, sie mir ächli versumpft
Jä das isch eusi Chluuri jä eusi Chluurizunft
mir mache eifach immer alles mit Vernunft*

Asyl bim Nachbar

S' letscht Joor do am Schnitzelbank Obe ' händ mir e geili Party gha
und wie immer het si g' ändet ' mit Musig a de Bar
au d' Carla hets a dem Obe ' wieder richtig lo krache
mit Aperol und Wisswii ' und suscht halt no so Sache

irgendwann nach Mitternacht ' het d' Carla denn langsam gnue
sie macht sich ufe Heiwäg ' und leit sich zur Rueh
d' Marco und Chiara jo die bliibe no ' sie sind no guet im Schuss
Dr DJ-hase sett jo au bliibe ' wenn möglich bis am Schluss

wo dr Marco und Chiara heicho si ' scho halber verfrohre
bringe sie d' Hustür nid uf ' sie chlämmt wiene Moore
aber kei Huusglogge, keis alüüte ' cha d' Carla jetze stööre
sie duet i ihrem tiefe Schloof ' jetz eifach nüt me ghöre

dr Marco isch verzweiflet ' wo sellä sie jetz go pennä
do gseht er bis Nachbers änä' duet no es Liechtli brennä
d' Christine und de Bruno ' düend denä zwoi Asyl offeriere
bevor die zwoi i de Chälti ' zletscht no müend erfriere

wo d' Carla denn einisch wach wird ' i ihrem Bett ganz allei
lütet sie im Marco a und frogt ' worum sin ihr nid dähei
mir werä jo gärn ine cho ' aber mir händ di nid chönne weckä
und s' nächscht mol los doch bitte inne ' d' Schlüssel nid lo steckä

*als chline Tip vo mir göhnd doch s' nächscht mol statt allei
gschieder wieder zämä hei
denn chönneters mache wie s' Blarers und s grad no nütze
die laufe zämä hei ' damit s'enand chönd stütze*

Ohrstöpsel

S' letscht Joor het mä e jungi Dame ' ghört es bitzli flueche
sie duet öbbis vermisse ' und sie dägis dringend sueche
d' Cheyenne lauft vom Uerbler bis ufe Chriesiberg ' und suecht au i i de Hose
sie het ihri Ohrepfröpf verlore ' wo me brucht zum Musig loose

Am Tag vorher het sie se no gha ' bim Brötle ufem Chriesiberg
doch jetzt sind sie verschwunde ' ligge au niene ufem Wäg
und au bi de Fүүrstell ' het sie ganz gnau gsuecht
sie meint dört hani si ' doch z' letscht no brucht

aber sie het se nümme gfunde ' und het müese neu bstellä
damit sie im Poschdi nid mues lose ' was anderi so verzellä
wo sie denn einisch wött d' Wanderschuh allegä ' sie die cheibe plötzli zchli
das isch au kei Wunder ' denn es sind Ohrestöpsel dinne gsi

*Cheyenne villicht hesch öbbis verwächslet, das willi zwar nid hoffe
es hät scho chli komisch usgseh, wärsch mit Sogge i de Ohr umegloffe*

Zunftmeister

Liebi Gäscht und Fans ' sind ihr Hüt au scho ufem WC gsi
ich gib euch e Tip rächnet für das ' ä chli meh Zit i
es isch nid wiels chönnti Stau ha ' das wär jo nid so speziell
nei denn de Wäg zum WC isch dekoriert ' eifach sensationel

euses Dekoteam hett ä Idee gha ' und het flissig gschaffet der
s' Dekoteam das sin Melanie ' Alex, Anja und Deborah
sie händ hunderti vo Föteli ' a d' Wand ane kleisteret
ville Dank es isch eifach huere geil ' was ihr do heit gleischtet

und wenn ich grad am danke bi ' denn wött ich d' Glegeheit grad nütze
und au im Schminkeam dafür danke ' dass sie eus so geil düend besprütze
zämä mit Ursi und Tamara ' sueche se für eus jedes Joor es Moto
und mir fule Säck chönnt denn zum schminke ' nur no vorne ane stoh

au suscht isch mit ufgfalle ' d' Chluuri duet sich immer meh optimiere
au dr neu Vorstand isch huere guet ' im organisiere
druum hei si gseit zu eus Chluuris ' nachem Dorf dekoriere
die wo nüt meh ztue händ chönnd scho afo ' Marathonsuffe z' trainiere

im Vorstand vo de Chluuri Zunft ' hets en Wächsel geh
dr Kim Markus hets Presidium ' nach 5 Joor übergeh
doch wiels nid so eifach gsi isch ' de Kim als Zunfti z' ersetze
btuchts jetz grad 2 Gysi- Brüedere ' zum eus Chluuri umme z' hetzä

*wenns mach Kim Heinz au 2 Brüedere brucht hätt zum ihn als Amme z' ersetzä
müest mä bis Hollingers dähei ' d' Rolle vom Choch neu bsetzä*

Bebbirot

Dr FCB isch im Moment ' es bitzli vo de Rolle
Uf dr Teletext- Tabelle ' muesch ganz wit abe skrolle
dr Burgener het jetz chli Schadefreud ' das es bim FCB nid rächt lauft
zum Glück het er die Bude ' im Dägä verchauft

sie händ denn nach langem überlegge ' dr Vogel entloh
doch churz druf abe händs en z' Basel ' wieder ane glo
doch d' Leischdig wird nid besser ' es blibt alles bim alte
ihr Deppä hättet halt vor Joore ' de Fischer sellä bhalte

e huffe Spieler düends verchaufe ' zum s' Finanzloch stopfe
wenn ich dr Dägä wär würd ich gli ämol ' zu de Gigi Oeri go achlopfe
doch au wenns im FCB im Moment ' halt ächli schlächter goht
so händ Bebbi jetz als chline Trost ' e eigne Bundesrot

*Jetzt chönnt dr Burgener jo in FC Zeinige investiere
denn hätti sie sicher gnue Gäld zum de Raseplatz z' saniere
Dr Vogel stellä si frei - und dr Frei zeigt allne de Vogel*

Zirkus im Dorf

Ich weiss nid öb ihrs scho ghört händ ' öb ihr's scho händ vernoh
es wölli schins e Zirkus ' zu eus uf Zuzge cho
denn e Zirkus het vernoh ' ich due das do betone
wenn mä als Zirkus deg uf Zuzge cho ' denn würdi sich das lohne

worum Zuzge für das so atraktiv isch ' will ich jetz euch erkläre
nid dass sich hinde dri ' no eine chunnnt cho beschweere
es lohnt sich für en Zirkus ' zu eus uf Zuzge z'cho
denn e wisses Zält und 5 Clöwn ' sigä jo scho do

und wenn mers grad vom Gmeirot händ ' do fällt mir jetz grad no i
ich weiss zwar nid öb ihr a dä letschte ' Gmeiversammlig sind gsi
es isch dört e huff gschwätzt worde ' und au diskutiert
und mängisch ischs au so ' und es wird kritisieret

das isch jo au ganz rächt eso ' das sell au so sie
das ghört schliesslich bi eus i de Schwiz ' zu de Demokratie
aber mängisch frog ich mi scho ' öb ich de richtig Ma füre Gmeirot bi
denn dr Sacher Gregor bringt jo us de letschte Reihe ' me Aträg dure als ich

*Gregor anstatt mi mit dine Gegäaträg z' quelä
würdsch di doch gschider einisch sälber als Gmeirot lo wähle
und wenns denn machsch ' denn hätti no e Bitt
bring de Koller Pius au gard mit*

Eine zwill

Nachere Versammlig vo de Chluuri Zunft ' chases scho mol geh
dass sich bim Alkohol konsumiere ' öbbe ein duet überneh
doch zwill suffe liebi Chluuris ' das duets nid immer bringe
de Gysin Tom cha euch do dävo ' au es Liedli singe

doch damol hets nid de Tom breicht ' es het e andere verwütscht
es isch de Noel gsi wo a dem Obe ' es bitzli zwill het gütscht
doch vernünftig isch er gsi ' und isch nüm uf Möhli abe
er het Zuzge Asyl becho ' bis Gysis im Leigrabe

won er denn ufem Sofa litt ' fangts langsam afo drülle
das chas scho geh wenn mä ä chli zwill ' duet obe ine fülle
er merkt das chunnt nid guet ' und es duet ihn scho avo gruuse
er weiss de Alkohol de wött ' dure gliche Igang wieder use

er weiss ufs WC secklä längt nüm ' i dem frömde Huus
und drumm suecht er sich i de Not ' s' nächscht Stubefänschder us
er risst s Fänschder uf ' und wött dort use blääre
und versuecht äso sin Maage ' biologisch unkorrekt z' entleerä

doch öbbis isch komisch ' dr Noel chas nid ganz verstoh
sin Maageinhalt wöt das frömde Hus ' nur teilwis verloh
das nid alles zum Fänschder use goht ' jo das lit do dra
es het a dem cheibe Fänschder ' no es Fliegegitter gha

*Noel, du bisch nid dr erscht Chluuri wos bim konsumiere ächli het übertriibe
aber ich glaub du bisch dr 1. Chluuri wo sini Chotzete duet sibe
D' Frau Habitec isch nid begeisteret gsi denn es het schins sehr stark groche
Aber stellet euch vor er hät z Möhli i de WG ' zum 3. Stock us broche*

Selbsthilfegruppe

Mit dem Chotze isch de Noel nid allei ' ich dues jetz do verchünde
do chöönt d' Chluuri scho bald allei ' e Selbsthilfegruppe gründe
i denä 60 Joor Chluuri ' isch scho mängä gsi chli bsoffe
und au ganz vill sind do däbi ' au scho überloffte

Ich bi sicher scho mängä Chluuri het scho ' anere Fasnacht müese brächä
doch Dunkelziffere isch sehr hoch ' mä duet sehr ungärn drüber sprächä
Doch 2 Chluuris händ do kei Scham ' und düend id Öffentlichkeit goh
und verzellä offe drüber ' wie de Maageinhalt sie het verloht

Dr Simi Hürbin het eus zum Bispil ' ganz offe gseit
ihm hebs z' Möhli scho vorem Umzug ' de Maage einisch dreit
und au de Mario isch offe gsi ' und zum redä bereit
er hebe während em Uftritt e Pizza ' hinter Zunftstube gleit

Doch au das Joor a de Fasnacht ' gohts mitem chötze munter witer
im Mario isch es scho am 1. Faisse gange ' scho es bitzli schitter
und au de Marco het 2 Täg spöter dänkt ' was de cha chan ich au
und het sin Mageinhalt im Car- WC übergeh ' ufem Heiwäg vo Littau

Ich mues sägä ich bi sehr stolz ' wie offe ihr über das Problem düend redä
und villicht chönne mer so au anderi Chluuris ' zum redä bewegä
es mues euch au gar nid peinlich si ' es passiert halt mängisch sone Seich
und villicht hocke mir nach de Fasnacht zämä ' im Selbsthilfegruppe- Kreis

Händ Muet und kei Angscht, düend offe drüber sprechä,
in Sache peinlichkeit chönnet ihr mini Gschicht ' no lang nid überträffä
doch jetz won ich ghört ha dr Noel heb es Baby akotzt ' es isch leider würkli
wohr

Gsehn ich mi Rekord in Sache peinlichs Chötze ' so langsam in Gfohr

*en Tip no füre Mario han ich do no wölle sägä
wenig Fleisch und vill Alkohol das duet sich nid verträgä
vo de Notschlofstell i de Rebhatt z' Hellikä ' sell ich dir Grüess überbringe
dr Herzog Beat het gseit du chämsch dafür cho hälfä Honig schwinge*

Ustrinkete

S' letscht Joor Endi April ' isches denn leider itroffe
mitem Rössli het die letschdi Beiz ' in Zuzge gschlosse
jetz isch eusi letschti Dorfbeiz ' leider zue
und s' Luci het vo eus müehsame Gäscht ' ändlich ihri Rueh

Jetz chann ich jo scho chli fräch si ' und mi luschtig mache drüber
jetz muesi jo kei Angscht me ha ' ich chämi Lokalverbot über
doch öbbis isch sehr komisch ' und ich has immernonig kapiert
worum het dr Chäser au grad ufghört ' de isch doch gar nonig pensioniert

Am Tag nach de ustrinkete ' stoht dr Gysin Tom vor sinere Türe
und luegt no voller Wehmuet ' zum Rössli füre
er denkt er gseht nid rächt ' und meint er sig villicht no ächli bsoffe
und drumm isch er zum gnauer luege ' zum Rössli füre gloffe

er trifft dört s' Hürbin Anja ' die isch au a de Ustrinkete gsi
und sie het zum Pflanze giesse ' e Sprützchanne debi
sie dägi Stross do putze ' het sie im Tom erklärt
es heb ihre do am spätere Obe ' de Maage einisch kehrt

Liebi Anja es gilt au für di ' es mues dir nid peinlich si
aber am Esse isches nid glägä ' do chönne mer sicher si
und wenn s' nächscht mol muesch go chötzle ' due vorher guet überlegge
denn dört wo du ane kötzlet hesch ' isch im Tom si Chotzi- Eggä

*sovill wie dört scho kötzlet worde isch würds mi nid überrasche
wenn bim Mächler anstatt Efeu, plötzlich Hopfe wachse*

Kei süessi Sach

Z' Obermumpf wohnt d' Frau Biedermann ' die meischte vo euch düend si kennä
sie isch bi de Zuzger Schütze ' und mä duet sie Sonja nennä
die het zum Geburtstag vo de Cousine ' de Gysin Tamara
e feine Chueche bache ' mit Schoggi usse dra

Doch wo s' Gysis denn voller Vorfreud ' i de Chuech ine bisse
fangts de Tom grad avo würge ' er findet de Chueche beschisse
Nei es heit kei Schöfigs din gha ' denn hätte mir das würge begriffe
Sonja het sich bi Salz und Zucker ' i de Dose vergriffe

350 Gramm Salz statt Zucker, jo das isch scho no krass
das längt jo füre Winterdienst vo de ganze Rössligass

2. Reihe

Liebi Lüt heit ihr euch au scho gachtet ' wenn d' Chluuri Zunft duet spiele
düend d' Manne vo de 2. Trompete ' ständig zu de Anja übere schiele
dass sie zu de hübsche Anja luege ' jo das chan ich verstoh
doch das het nid nur mit ihrer Schönheit ztue ' so han ich vernoh

doch sie luege ihre nid ufe Popo ' und au nid uf ihri Titte
nei sie luege nur uf ihri Finger ' und das was die düend tippe
denn anstatt einisch ämol dähei ' die Stückli studiere
düend sie sich sid Joohre ' a de Anja orientiere

doch hebet ächli muet ' isch au ämol e falsche Ton däbi
nähmet euch es Bispil ' am Helliker Otti
de hets i 50Joor Helliker Gugge gschafft ' es isch jo scho verruckt
und het sine Fentil am Instrument ' nid einisch abedruckt

liebi Manne vo de 2. Trompete ' duet bi euch au nid so vill use cho
sit ihr doch wens ums schaffe goht ' vill meh als anderi do.
und sorry das das ich das Wort Titte brucht ha ' ich has nid sexistisch gmeint
aber Buse, Möps oder Glogge ' hätt sich nid uf tippe greimt

*Dr Otti mues jetz zum Glück keini Ventil meh betriebe
er duet jetz als Wabrig- Häxä ufem Bäsä umenander fliege*

Reno 40

Liebi Chluuris ich mues scho sägä ' ihr sit e geile Huffe
doch düends doch in Zukunft ' nümm so übertribe bim Suffe
denn villi vo euch meine ' sie chönne mitem Reno mithalte
doch gegä Reno heit ihr kei Chance ' mag er au sie e sone Alte

denn euse Reno chan ich euch sägä ' das isch en sehr en spezielle
de goht vorem schminke meischtens ' neumä ine Knellä
er goht dört denn fein go Ässä ' und sufft mindeschtens ei Maas
was de Reno cha suffe ' jä das isch scho no kraas

dr Reno duet sich amä ärgere ' es nervt ihn scho e chli
wenn mir z' spot afange probe ' macht er gli scho mimimi
oder au wenn anderi regischder falsch spiele ' nervt sich dr Reno gruusig
Reno nimms doch nid so ernst ' mir si doch e Guggemusig

dr Reno cha au mi 2 Promille ' spiele wie e Gott
mir sie froh spielt er bi eus Posune ' und nid Fagott
sit 40 Joor bisch bi de Chluuri ' do knie ich mi vor dir nieder
und damit du chasch zeige was du chasch ' spiele mir nachher Altes Fieber

*wenn dr Reno ächli eine he, duet er vill weniger motze
aber bis de de Alkohol fangt avo gspüre sind die erschte scho am chotze*

Schlussbank

So liebi Lüt ' jetz muesi langsam goh
und es paar vo euch sind jetz erliechteret ' und au richtig froh
erlicheret do drüber ' das ich nid alles ha vernoh
jo denn heit ihr Schwein gha ' und sitt leider dävo cho

ich hoff es het euch Spass gmacht ' und ihr häbet nid vill zmotze
au wenn die meischde Bänk ' ume ghandlet händ vom chotze
so jetz muesi höre, aber ich due euch nonig verlooh
aber wenni jetz nid gang hets keini Chips meh ' bim Sponsore- Apéro

wenns euch gfallet het denn sägets witer ' das wäri wunderbar
und wenn ihr euch weit erkänntlich zeige ' ich bi nachher a de Bar
ihr chönnet mir denn es Bierli zahle ' und mi villicht es bitzli lobe
ville Dank fürs zuelose ' euche Fippi vom Uerbler obe.